

16 OCT 1996

UM-Alumni

PERTEMUAN ALUMNI UM KL DAN SINGAPURA

KUALA LUMPUR, 16 Okt (Bernama) -- Yang di-Pertuan Agong Tuanku Ja'afar, Perdana Menteri Datuk Seri Dr Mahathir Mohamad, Menteri Kanan Singapura Lee Kuan Yew dan beberapa tokoh lain dijangka bertemu pada satu majlis alumni Universiti Malaya (UM) yang sedang dirancang April tahun depan.

Majlis pertemuan tiga hari mulai 18 April itu dianjurkan oleh Unit Perhubungan Antarabangsa dan Hal Ehwal Alumni Universiti Malaya (UM) bagi menghimpunkan bekas pelajarnya pada tahun 1960an dan sebelumnya.

Yang Dipertua Negeri Pulau Pinang Tun Hamdan Sheikh Tahir, selaku pengerusi jawatankuasa majlis itu, berkata ia bertujuan menemukan bekas pelajar UM di Kuala Lumpur dan Singapura termasuk Kolej Raffles sebelum pemisahan Malaysia dan Singapura.

Sejumlah 1,000 alumni dijangka menghadiri majlis itu yang akan diadakan di UM, katanya pada sidang berita mengenai pertemuan itu di UM di sini.

Katanya Dr Mahathir dijangka menyampaikan Syarahan Perdana Alumnus semasa pertemuan itu.

Acara lain ialah pameran buku karya alumni dan lawatan ke beberapa tempat menarik di Semenanjung.

Tun Hamdan berkata pertemuan itu bertujuan mengutip derma dana alumni yang akan digunakan sebagai biasiswa kepada pelajar UM di kedua-dua negara dan juga penyediaan kemudahan di kampus-kampus.

Katanya setakat ini jawatankuasa majlis itu masih mengumpulkan nama-nama dan alamat bekas pelajar berkenaan untuk dihubungi.

Kampus UM yang pertama ditubuhkan di Singapura pada tahun 1949 dengan gabungan Kolej Perubatan King Edward VII yang ditubuhkan pada 1905 dan Kolej Raffles tahun 1928.

Kampus UM di sini ditubuhkan pada 1959 dan ditadbirkan secara berasingan dengan kampus di Singapura sejak 1962.

Selain Tun Hamdan, Tuanku Ja'afar dan Dr Mahathir, bekas pelajar Universiti Malaya sebelum 1962 termasuk bekas Perdana Menteri Allahyarham Tun Abdul Razak, bekas Ketua Setiausaha Negara Tan Sri Ahmad Sarji Abdul Hamid, Profesor Diraja Ungku Aziz dan Naib Canselor UM Datuk Abdullah Sanusi Ahmad. -- BERNAMA

NI RON